

竹

初

詩

鈔

竹初詩鈔卷十四

武進錢維喬樹參著

姪伯垌

中錫

編

子中鈞

孫潤斯  
漆斯

校字

抵都夜宿管戶部韞山寓齋

十年不踏長安土下馬籠燈款排戶一笑呼迎出故人  
面色欣看各飛舞三更爲我羅杯盤濁醪凍挫玻璃寒  
煖湯翦紙客魂定促坐不覺夜漸闌人生歲月如流水  
相遇天涯若相待家門互審世情無出處就商交誼在  
聞君服官邁等倫見君忼爽全天真絳帳依然教弟子  
白華躬自娛慈親書生事業何求異素位先從力能致

不因人熱梁伯鸞直道而行柳下季酒酣我稍狂氣舒  
借問從政今何如酸風射帘粟起膚亂以他語君長吁  
歲云莫矣百憂逼呼僮撥火起行炙此會且復懽須臾  
轉眼關河千里隔

喜見四姪宣之

送子甬江畔重逢歲又寒最憐能自食漸及得卑官客  
久人情出交多禮數難從今投世網須把佩弦看

吾衰行自覺骨肉况離羣翫共燕臺月彌思閩嶠雲

客漳州

久矣歸期傳屢誤暮景感頻聞寸草兒曹意如何慰

夕曛

謁廣庭相公

鳴珂乍散履徐聽風度重看拜九齡憂國漸添雙髻

白論詩猶記一燈青教除害馬斯良吏便到亡羊莫反

經二語相公相勗之言最是相門清似水獨留狂簡語丁寧

廣庭相公微有重聽退而賦此

幾載槐廳隔笑嚬復從侍坐揣精神盛衰于國關元

氣耳目何人並帝臣萬口鴻哀煩入告公近者奉使還口奏安徽

災狀請發帑展賑須數百萬金得旨命允千秋鑑期待徐陳知公放鄭聰

無減長作夔龍護紫宸

得曼亭札有懷

之子忽行役川雲西望深簡書今日路琴鶴舊時心

戟趨嚴幕湖山緬越吟丈夫勤國事慎弗感升沉

去及雲隨馬歸當峽下船詩囊留補闕

曼亭昔在蜀別守未及江行

路動經年輓粟千村望飛帆五兩便春醪期共把分我

錦江賸

贈呂甥叔訥

燕臺風勁木蕭騷感遇三冬首漫搔遊子盤惟求苜蓿

才人筆偶賦櫻桃

甥有芸閣賦爲歌童作也

丹青重灑半曇淚

子偕甥

琉璃殿購得先文敏兄畫一幀

霜雪偏繁須賈袍

甥所衣裘自云珍重塞上故人所寄

歲寒生計好得歸免使倚閭勞

長至後一日客舍喜雪

今年何干支雨澤愆南東慙慙旱旣久自夏徂秋冬我來過齊魯乾土連疇封流民道相踰婦孺號饑從上公

乘輅車淮海觀隄工一一鄭俠圖繪入先憂胸還朝拜  
稽首入告無所蒙數百萬金錢乞振災黎窮如傷本宵  
盱豈吝王居充立詔左藏官挹注籌噉鳴時將祀南郊  
至尊居齋宮輾側念天戒不寐憂沖沖作詩自刻責有  
咎在朕躬禮成法駕還詰旦同雲濃重陰漸作勢霰  
集交朔風自西吹翼中飛翼散濛濛我聞皇天仁于物  
忍降凶陽感不旋日唯聖誠可通盈尺果兆瑞三白  
謳符農小民彼何知調燮君相功旅人暫索米僵臥  
寒衾中願持蟣蝨忱歲歲祝屢豐

劉給諫退谷招餞口占留別

一曲驪駒酒數巡還轍依舊作勞薪行藏尚幸謀元老

巖壑終當報故人雪後觚稜初見日笛中柳色已先春  
石交海內今無幾莫靳封書慰所親

鄞邑諸君張樂宜春園相餞卽席贈別

天邊初見琯飛灰綺席俄教折東陪甬上人文多愛客  
燕南雅部乍呈材新聲似奏關山月後約唯憑隴首梅  
我是工愁桓子野聽歌幾處費低回

五載塵荒單父琴漫隨計吏整朝簪官聲自聽諸賢口  
宦境多非清夜心綠醕凝寒人易別紅牙按月漏初沉  
相思倘憶南鴻杳記取金臺變徵音

曉發三家店

就枕竟無寐出門朔吹涼危橋人影月衰草馬蹄霜市

火迎車過村酤喚客嘗莫愁衣袂薄日出漸蒼蒼

香城鋪

客夢荒雞外寧帷見曙痕寒烟多冒樹野水自環村對  
語僮偏倦投餐馬載奔艱難非道路所惜廢朝昏

寄懷吳侍御槐江

白飯青芻肯款留故人情重憶同舟

已丑歲予與吳君同下第作伴南歸

雲龍相逐知無分蘭茝遙通或有由元結官心仍漫士  
臧嚴賦草但屯游煩將痼疾敝黃閣遣作江湖一醉侯  
獻縣郭外晤莊上舍然乙

不見莊生已四年道旁執手乍淒然一官蝸角嗟何晚

雙淚鵠原黯自憐

令兄歿于滇南

別路寒隨衰草遠吟懷愁與



亂山連此行後會知何所各向斜陽嬾着鞭

懷篠如時曼亭尚于役川中

見日長安遠如天蜀道難遙知湖畔客同此月中看酒  
向殘年醉裘非故國寒清宵離合感不得借征翰

道中見流民絡繹有感而作

民有失所天其象立彫敝畿輔稍順成東人屢歉歲二  
麥久未種一鬴安能繼流民輕其鄉轉徙擇異地且行  
亦且乞扶老或抱穉富者稍益藏競爲自活計或齋旁  
郡糧聞登萊二郡較可千里艱輦致以供行旅食市必三倍利  
貧夫囊無錢熟視但垂淚煌煌榜通衢官府大賑濟苟  
得延殘喘盍往粥于是復聞令甲宣衣單乃給餌可憐

溝壑軀敗絮半猶曳其身不得煖轉使仁政棄蚩蚩盡  
赤子遘閔何別異立法未盡善得母在長吏來逢鳩鵲  
愁去莫號號避裘馬我何人軒車過徒媿

偕行陳生買得幼童作詩閔之

穀貴人則賤重命乃割恩骨肉委路旁棄幼長暫存探  
囊五百錢易此三尺孩其一旣書券相率如蟻來俱云  
願得食驅之不肯歸匪我求童蒙活此亦仁術焉得人  
人濟道旁築萬室衣破脚不韞髮鬪面已槁呼詢其耶  
孃言語頗了了從此違故鄉遠去若孤鳥彼童何所知  
色喜竟就道我旁觀之重歎吁人生窮餓何事無君不  
見王孫有時乞爲奴

過東平州追悼莊大令尚儀

官境竟如此傷君萬里魂地過秦贅舊

莊君曩依其外舅沈牧子每北

行過東平輒相見也

詩借楚招存賦鵬三生厄嘯鵠八口冤荒郊

相揖處髣髴夕陽昏

途次懷楊孝廉六士

別從何歲記依稀書到齊雲夢與飛遲我數旬猶得見

君館于東昌子過荏平相去六十里至此君已先歸矣

隔君千里不同歸關河木

落空搔首松菊庭荒未拂衣歲晚江鄉暫相聚各將心

緒訴斜暉

過汶上復晤李秀才濟民

舊路縈殘雪單車到故人重成千里會共話一燈親月

析藏孤館霜鐘渺去塵臨歧兩惆悵別緒欲沾巾

西楚霸王墓

項王雖不帝蓋世氣猶生力足收秦鹿頭還下魯城鴻溝諸將約垓帳美人情今日荒碑過如聞叱咤聲

宿東阿舊縣對月作

蒼村初見月千里對嬋娟霜氣自然冷風聲不易眠吟常成獨夜心只寄遙天爲報歸鴻覺南雲正渺然

邳州郭

我行邳州郭其濠石梁臥梁窄容兩馬四馬不得過我車旣坦行後車旁睨之憚解左驂勞徑從冰上馳河冰雖已合任履不任輪半渡忽迸裂轅駒先殛身鞭之強

使起溜滑足窘踏一馬蹴不休三馬殪以立車子顧而  
下將衣被腰間腳脫兩芒屨股去斜幅纏持竿前繫冰  
冰勢轉腹堅迴頭再叱馬馬仍不能前橋南有觀者投  
絙繫輪右十人邪許寧助馬使馬走須臾輪轉冰玉碎  
聲軒礧遂挾霹靂旋直割玻璃平車子徒跣從冰破倅  
刃利如行蒺藜叢賺肌血流刺忍寒噤不語登陸慄猶  
悸人旣夷于股馬亦顛且躓始情後徒勤欲速反得遲  
後車可以鑒萬事恒如斯

陰平曉行

川塗竟何極歸計髣霜知古堞雅飛處荒原過客時遠  
村兼樹密寒日下岡遲漸近江南路衣慚京雒緇

臘月十四日衆興旅舍初度作

柳州歿年四十七其人其文足千古我今碌碌百無成  
雖存已如草木腐古人五十云始衰我今頽憊先其期  
下焦疝疾恃火齊右目翳障無金鑊去年大府察羣吏  
署我上考我滋媿苦辭不免賦北征長安如天躡而至  
小臣亦有葵藿忱得瞻雲日喜躍生自分歸將老農圃  
豈得再向蓬萊行計程往返六千里新婦幃車閉不已  
長途幾復錯昏晝獨寐偶還籌甲子我生樗散宜山顛  
擁腫不得全其天周妻何肉俱可割惟有結習文字緣  
居官旣遭堆案黷于役復被驚塵辜此身一日惜一日  
如火熱物終成烟蘆帘敗壁風聲吼土竈夜寒乏杯酒

得免凍餓皇天慈蜩竅一吟還自壽

將抵王家營

夕陽疲馬力墟里望頻非敗隴羊牛下荒疇鳥雀稀流  
亡覘守土輕暖媿初衣一飯茆檐宿無人賦采薇

雲陽驛旁旅店對月

推窗殘月尚如新獨宿郵亭問夜頻怕向清光添白髮  
重看又是一年人

除夕感懷

巢南踪跡久飄蓬暫返江關似寓公十口尚看羈海上  
一年忽復盡塵中心驚爆竹排門響眼倦桃符貼戶紅  
處處山陽感吹笛不堪髣髴髮屢春風

心冷方同退院僧，厯飲罷轉膏騰。正愁地下逢兄嫂，  
方爲先嫂雅存自河南歸且喜天涯到友朋。六士自山東歸儉歲鄉園  
營窳窳，慚駱統廉身樵采負張膺。何當真遂閒居賦，老屋寒梅  
守一燈。

題楊孝廉六士授硯圖

孝廉母金太夫人大瓢楊先生名賓之女甥也  
孝廉幼時太夫人以大瓢先生所遺硯授之太  
夫人沒孝廉繪爲圖索所善詠其事爲題古詩  
一章

國初以來推孝子大瓢先生最有名，身行絕塞數萬里。  
遠求成父何精誠，鄉思樓中著書處。鄉思樓大瓢先生故里也屋是



人非烏滿樹惟有當年泛海圖

大瓢圖畫先生坐一瓢泛大海中曩曾見之

猶令人間重縑素硯山十二今何存

大瓢先生有硯十二所授蓋其一也

其一流傳歸從孫從孫六士之硯受自母宅相以孝延清門人生百物非美好手澤所遺乃至寶我有先人干卷書歸看散亂如秋草母期榮名以最兒兒繪作畫永孝思發爲文章燦星斗藏以什裏生芝栴吁嗟乎豈無玉堂鳳味華且貴不如此硯中含數點淚

題汪七傳舟小像

華屋山邱總愴神披圖今復見斯人千金也自教歌舞

一到斜陽化作塵

汪君子妻兄也曩有梨園一部頗擅名里中

裴几緇簾尚悄然重過惟有總幃懸馬蹄秋水人間世

不出南華內外篇

像圖清溪一角  
有圍人浴馬

偕洪太常稗存楊孝廉六士蔣上舍松如暨從孫

### 輩遊慧山

春遊不擇路花竹皆清娛初停水半篙旋憩山一隅層  
崖未改色別我十載餘童冠三五人偕往興弗孤晴柯  
鳥乍嚙曲磴草漸燕粥鼓寂不試梵磬出以徐精藍展  
茶具製樸今所無媿乏買山錢略試調水符人生名利  
心一澹白足廬清泉瑩見底返我太古初梅寒半斂萼  
笑客塵未除暫挾蒼翠還爽氣生襟裾

### 寄暢園

名園必依山結構得自然惟此十畝宅能導百折泉叩

門出雙鬟鍵戶先索錢探囊幸不澁挂笏或有緣便作  
繞屋行到眼竹樹妍清池漾空碧照影梅孤眠屋角雲  
屏張嵐翠共一天橋斜石齒齒徑曲流涓涓虛亭不逢  
人高閣迴出烟晨鐘自何所紺宇周垣聯爲訂重來期  
白鳥飛春田

訪楊邛州笠湖話舊作

清齋坐久見髯翁迴憶春明一笑同華髮我來嗟亦老  
衡門公住樂何窮枕中鴻寶新成論新著筆談出以相示肘後方  
書舊奏功翁久服胡麻備論臨別丁寧寓招隱重將山  
閣寫吟風翁官蜀中建吟風閣曩于都門曾爲作圖今慧苑亦搆此閣索予更爲寫之

偕諸君從鄧尉山行探梅

十里五里香風加一村兩村修竹斜青山在眼不遽到  
隨路要與花爲家梅花本吾素心侶手植官衙愛幽楚  
夢裏林棲幾樹疎豈知到此紛難數筍輿虛舁下走頻  
未敢倨坐見美人看容我輩庶不俗縞裳素袂添精神  
低壓帽簷橫觸袖花街濛濛往還又影雖絕世似相憐  
氣已殫人不待興長松蔭處塚數堆我欲徑就此處埋  
落英墜土香入骨更化千株似雪皚

登香雪海絕頂

花耶人耶兩不分上山衣重生寒雲俯看但覺白無所  
遠近一氣春成紋茫茫似雪竟非雪間以青松作層列  
數叢身入意已忘萬疊晴鋪眼難別人間是處塵作海

此境清芬墮不悔天公徑欲留我住  
降雨冥濛雜花灑東風絕頂吹客裾  
排空欲動香糝糊指點輿夫認歸路  
扶我仍從海中去

自鄧尉還冒雨遊靈巖山館作寄呈畢秋帆中丞  
山館者中丞別業也

幽尋發高興餘勇無雨師一身香國來肯使山靈嗤觸  
暝衣盡濕緣崖足忘疲遂得款柴關踐此後至期

先一日諸

君已

遊此長松列如人導我入翠微赤闌幾版橋碧澗半折

蹊中道亭影豁絕頂燈光垂逕出犬吠叢直攀幽鶻棲  
層廊繚而曲升降不可齊石壁鳴暗泉花氣時一霏人  
生易百年返樸會有時

山館中丞自營兆域于此

息壤不手定樂否

豈自知東山未還謝爲繫蒼生思要其巖壑情不以簪  
紱移湖明忽出林月黑漸映池似荷造物愛不遣歸路  
迷一往遊竟成萬事恒如斯循行雖草草勝處已略窺  
經綸及名山風雅今所希客猶秉燭遊主豈蠟屐遲作  
詩以遺公此景遡沙隄

邵太史二雲招游湖山因與稚存同登南屏午後  
飲于白雲菴同座者蔣侍御榕菴史秀才右張

重陰天遣放春晴得向湖邊取次行山意不嫌遊屐少

梅花直似主人清席間撰杖尊前輩

侍御年七十有八

酒罷論

詩競後生笑指桑田等間改

去歲湖水涸可以走馬今舉目尚泥沙也

不如

遠赴海鷗盟

淨慈方丈題張公自畫小像卷子

平生未結遠公期，夢覺聲聞失本師。  
重向空山展遺影，

梅花如雪落清池。

裴偕袁簡齋平瑤海過寺中曾見此卷

過世維摩猶有畫，在家靈運漫通禪。  
人間色相從何脫，聽到殘鐘一惘然。

篠如置酒爲予與稚存六士酌別口占贈二君

一尊何處繫相思，同向春山著屐時。  
才士天教成小別，梅花人各訂深知。  
輕寒雨館挑檠易，薄暝江帆帶夢遲。  
記取湖光照雙鬢，都將鷗鷺証歸期。

瀕行寄篠如

一見一回別，應知老不難。  
夢隨江水濶，春入雨聲殘。  
酒

憶三分醉漿憐半寸寒近來移帶孔誰識爲之官

渡江

急雨初成漲高風乍放船蒼山全入霧白浪竟無天命  
與孤帆合愁隨落照懸檣烏應笑我來去自年年

入四明境

身輕半載爲無官重向樊籠意未安宦海豈容終老入  
家山只許暫時看爭投吏版迎如故再到民情稱愈難  
我自幽懷戀猿鶴挂冠色喜勝彈冠

管韞山戶部奉使來越月餘矣予至武林甫得相  
晤喜而有贈

天邊忽報使車來七箸眞驚一震雷金粟徐聞明主



詔湖山遙隔故人杯 朝廷所望惟廉吏卿相兼容及

衆材誰識夷吾濟時手官書午夜費親裁

遠道初停上計鞭

予北行甫還前上卽值鉤稽之役

書生正乏買山錢

桃根豈意蟲來齧海水仍煩石去填江上蓴鱸嗤薄宦

天邊笙鶴笑頑仙姑臧雖美曾何戀遲我抽身又二年

憶別長安復幾時越山青挽去遲遲郎潛已覺聲名貴

吏隱唯應髣髴知款語每終三寸燭

寓居與韞山不及半里過從話舊輒

至夜

輕輅只帶一編詩

韞山行麓有手訂唐詩出以相質

知君肝膽逢

人與何況行藏耐所思

以所藏趙文敏書衛生歌冊子贈廣庭相公佐以

長句

方今 天子之重臣文武將相備一身惟公威德莫比  
倫海內望若鳳與麟公之英爽凌秋旻兩眸如炬直射  
人偶作大笑兼喜與僉邪氣讐不敢伸旌麾三駐越水  
濱達官投謁却走踈舄哉五嶽高嶙峋疲庸豈易登其  
門賤子獨荷拂拭新不持手版闖入頻食云則食陪坐  
茵啖以珍味飲以醇狂言脫帽俱率真俾無所隱得盡  
陳公曰才難孰可掄汝猶下吏跼風塵芻蕘之論碩輔  
詢禮遇奚翅家人親衆皆驚愕何所因我惟退感涕淚  
紛公無嗜好獨書史耽弄柔翰等儒士成百戰功行萬  
里上馬下馬管城子詩宗老杜書法米力祛時媚臺妙  
體時于空中運挽指蟠銀屈鐵隨手起我有遺翰趙承

百厥歌衛生詞壘壘袖進之公公色喜謂其勁秀抉墨  
髓人生難得一知己倒迎何況上公屣雖收衆材宰相  
理寵逾其分顏自泚豈無朱門競如市南金大貝并象  
齒我之悅公以尺紙區區割愛鴻毛耳玉堂清晝香盈  
几摩挲錦暉墨光紫物得所珍何彼此較藏白屋矧倍  
蕤

題畫

筆底烟霞總未忘又從生紙寫秋光疎林一角蒼山遠  
知是天涯近夕陽

此身巖壑最相宜不合塵勞染髩絲今日拈毫寫烟景  
碧山聊與訂幽期

寄祝廣庭相公七十壽詩一百韻

第一功誰屬 熙朝有大賢降神生自厚好德福能全  
柱石高今古鈞衡濟後先殿邦黃閣迴拱極紫垣連喜  
起覲皋拜薰和叶舜絃算恒週絳縣飲弗藉丹泉純嘏  
從天錫康強與道延由來頌仁壽略可借言詮芝茁聞  
含秀松貞早挺堅瑞曾徵鵲印譽足繼貂蟬爛電光流  
目騰鳶聳喻肩骨堪侔嶽峙氣欲並霞騫便負台司望  
初升博士員潔躬援蕙蔭峻節視鷹鷂蔡戟門方盛科  
名手更摹廿年調鼎鼎百戰致絃綆榮悴經盤錯公忠  
效吉蠲泰交原進漸晉錫特孚乾始仕雲司蔭俄因駕  
部遷清郎持八則樞省計三銓何武廷評切平當家法

傳章相成重器磨礪底溫瑄妙選依綸禁欽承侍

講筵西江廉牘審東觀挾辭妍本以謨猷著宜叅帷幄  
前建威初奉使定遠正華年剛氣難迴席英聲銳著鞭  
蜚文工攬拾果力濟迫邈累伐三朝叛平開萬里邊  
挂弓逾瀚海表柱跨和闐庭本單于舊官應都護沿新  
降勞控馭絕域寄旬宣大啓耕屯利兼收鼓鑄權周防  
西面策愼固北門鍵戍角秋無警軍烽夜不然經營由  
昔矣耆定及今焉蠻徼尋征緬旌麾繼出滇副持平蔡  
節分督渡瀘船却瘴憑餐苡衝炎避跼鸛決機懲采入  
持重贊言旋未論全師賞仍張禦寇旃併侵諸土舍偏  
強兩金川狼顧常偕狙螳殘更孽蜚指揮煩白羽鎮轄

牙切詩少

盡災撫牲璧捐趾勤公相屢歡動卒徒千露冕行將遍  
霜廬瘁不眠力深趨引易誠感合豐遄竹箭支分駛桑  
麻野復蠡每過勤奠輯所至釋癘痛漕復連檣轉民鳩  
比戶痊諮詢周蒞華忭舞夾輶輶再有甘涼蠹頻滋回  
紇羶丈人師用律諸將鼓齊鰲馮異惟休樹營平竟定  
开瘡痍還衽席鋒鏑化犁犍豈惜臣躬蹇惟期王路平  
髣隨關塞換月幾道途圓水土功偕奏兵刑任兩專堂  
仍開綠野業未改青氊庭下傳詩禮懷中寶槩鉛藥欄  
常不葺鼓吹只虛懸供食俱恒饌娛情少曼鬻祗期心  
體 國豈意地行仙緩陞朝爭跂昌言度獨翩蒼生託  
伊呂 黼座倚彭錢壽域隆敷錫宗臣廣化甄 湛恩

千叟集論道一元筌闔闔者英社旂常寶籙箋郤蕭紛  
佐史褒鄂半裨偏小子牆叨侍先兄雨舊聯鑄顏深愛  
育說項感纏綿敢比荀陳誼彌推軾轍憐掃門頻拜越  
聽履昨瞻燕金粟香浮醖銀蟾彩吐弦普天椿祝歲奕  
禩玉爲田窺蘊胸慚管臚勲筆乏椽微詞展葵藿聊附  
九如篇

夜坐有懷篠如

甬江如練鎖離懷歲歲萍踪與鴈偕每見互看增白髮  
同游空復數青鞵春間與篠如探梅元墓秋風海國人千里夜雨  
歸篷水一涯可憶頻時情話處亂蛩淒切滿荒階

寄曼亭



一卷新詩格韻清頭銜添署萬迴名

曼亭自蜀歸得詩百八首自號萬迴

居湖山久住緣非惡關隴初歸氣未平食鴈美休爭世  
味盟鷗冷可悟人情泰嘉明鏡江淹管底事垂簾足此  
生

中秋夕不寐寄篠如二首

海上團圓月頻看已六秋獨吟仍作客永夜自生愁天  
借浮雲迴庭兼雜樹幽姮娥應惜我難向廣寒遊

有恨惟黃葉無情是碧天不憐雙髻改又放一輪圓歲  
序銷涼鴈關河入暝烟低回對尊酒空賦小山篇

陳太守紫岱屬寫香厓旅色圖卽題五古一首

夙聞桂林山鬱爲百粵首延之讀書室元康騎鹿藪其

奇孕英賢其秀毓壽耆詩人始堯賓高士緬唐叟芳躅

雖異致令德皆不朽軒軒太邱公系本清門後早隨黃

閣老

太守弱冠從其世父文恭公敷歷中外

學道得所受一官燕豫間旋

向滇南走

天子書姓名錫之銀青綬明州跨竹童遂

得賢太守五年神君頌治術悉醇厚賤子依末光亦如

蒙發蔀暇日呼賓僚後堂置清酒爲言宦游境佳處唯

某某青鞵與布鞵素願空在口命我作新圖息壤期不

負我聞古循吏徵黃龍無偶方將布霖雨豈許戀林阜

我未經香厓公言熟胸久陡然潑墨瀋萬壑起窓牖泉

聲競幽巖榭葉蔭連畝想見匹馬行遠從柴荆扣人生

好山水過眼竟何有未停旅客輪徒煩畫師手自慚幼

與癖鹿鹿爲升斗于公雖屬吏風義兼師友倘憐不食  
瓢芟此似苗莠一笑海上查千金返做帚

再過吳氏小園觀牡丹

七年酒國繫浮槎嬾問鄰園富貴花春事漸闌人獨往  
詩情無賴酒交加重看粉壁留殘墨依舊雕楹護淺霞  
深色一叢三歎在再休鬪艷譜繁華

聞二兄自閩歸里

阿兄一紙報平安細說歸程破涕看羽檄正愁馳海上  
釣絲且喜整江干老嗟骨肉違千里貧媿風濤戀一官  
何日草堂營半畝舊盟松竹不教寒

長歌贈周秀才鐵厓時秀才宿予衙齋

人生讀一未見書有如老饕驟啖丙穴魚丈夫得一直  
諒友有如鍼師刺痠蹙然走我來句章逾六年偃室絕  
少澹臺賢舉杯三人藉明月堆案一尺惟塵編頗聞慈  
湖周秀才蛩然足音天外來新詩袖出丹綠滿展誦大  
叫稱奇哉青蓮飛去浣花死拉雜箏琶日盈耳祭獺都  
矜飾采工掣鯨誰解排空起吁嗟乎我不能學山圖桂  
斧神仙倫服食霞舉游九閭復不能效曹蜍李志握齏  
輩厭厭竟類泉下人唯有世間一二奇傑士眼前數卷  
冰雪文靜坐白石觀青雲相對足以開心神周郎磊磊  
落落有豪氣其詩力能破餘地文章交道皆天真於君  
兼之良快事復探妙理軒岐家不試故藝聖所嗟醫國

會資鹽梅用活人豈獨刀圭誇小林棲邊初月生數叢  
瘦竹秋窻橫酒闌四壁蛩螿鳴城頭撾鼓俄三更萍逢  
會合事非偶江畔鷗盟寒已久我有痼疾綠烟霞借問  
君還能治否

曼亭通守奉檄勾當海艘來鄞下楊署齋喜而賦  
此

同爲越鳥別經年甬上重逢月乍弦萬事難憑惟薄宦  
一尊無恙是遙天鯨鯢秋老氛猶在檣艣風高到恐愆  
頻使昇平糜轉餉幾人籌海署新編

中秋夕聽雨同曼亭作

令節經愁賤天涯况未歸如何今夜月不照故人衣海

氣連陰易秋聲雜雨非西窗三寸燭翦盡夢依依

喜黃山姪至署

知爾吳山住扁舟迓果來清狂仍到眼節序且銜杯風  
雨秋能合關河老易催終期免搖落一振阿咸才

同年陸觀察蓮菴勸予置妾詩以謝之

庚桑久謚山居道何季猶兼肉食緣已分枕衾成獨旦  
未須絲竹遣中年幽蘭漫結勞人夢飛鵲虛邀明月憐  
駱馬楊枝亦塵土此身終擬一生天

曼亭將返權贈之

一月明州住相親似海鷗來仍同聽雨別總易驚秋塞  
鴈涼先到江雲曉自浮宅山無美酒

鄭之宅山有泉可  
釀近亦虛有其名

何以慰離愁

漸近知非歲曾無見道心山中遲采藥海上偶題襟客  
久交彌寡官閒詩更深空教感莊舄愁荅暮蟬吟

陸廣文維南朱秀才嚴上舍偶過小飲辱次集中  
小林棲舊韻見贈率成二律奉酬

千里苔岑結契新傳杯差喜趁蕭晨秋光繞郭能延客  
雨氣連宵正感人海國盤餐宜對酒琴堂訓荅媿兼塵  
諸君大可爲稽呂莫學勞勞爨下薪

白日堂堂去奈何一官猶向折腰過庭餘殘菊能無惜  
詩爲寒蠶未敢多今雨天涯增繾綣故山雲外久蹉跎  
士龍笑疾煩傳我

陸君襟懷爽  
逸談笑過人

暫破愁顏片刻醺

小林樓對雪作

朔風吹雲雲不流遙空凍合銀海浮初聞浙浙響到耳  
漸覺皓皓光生眸官衙數椽屋打頭寒簾凜冽侵敝裘  
賓朋拍手各大笑謂此玉戲殊清幽逃濛一氣灑無際  
健柏低頭竹拜地唯有疎梅三兩叢暄妍未改先春意  
我來句甬已七年風塵坐失太素顏旣不能掩關徑學  
高士臥復不能蓑笠獨釣寒江船一尊歲尾暫得閒突  
兀聊聳詩人肩却思王師海外方掃穴軍容如荼燎  
成列渡馬須憑鵝鴨聲洗兵便借鯨鯢血臺匪不靖近有捷音書  
生白戰蕭齋中瑟縮徒傍爐火紅強搓龜手賦形色豈  
識滕六司天功又聞田公以此占二麥勝于瓊瑤降阡



陌他時歸作太平氓唯願歲歲江鄉見盈尺

偕芷亭壻黃山姪金魯看梅作

我欲探梅已二旬清興竟被天公與重陰半月雨不止

霽色今始開新春籃輿便過慈水去問訊資西寺前路

寺卽在金魯人家修竹半圍園山徑鳴泉屢成渡初見三株

或五株漸看一片瓊瑤鋪花光渾不辨深淺香氣直欲

參虛無縞裳仙人競招手笑問塵襟破除否天邊可惜

絕代姝相逢遲暮空搔首梅花憐我容枯槁我亦恨梅

開太早芳信偏教隔亂山夕陽最是傷幽抱却思前年

遊鄧尉正值繁英放晴媚盛衰轉燭物固然亦有芬菲

有蕉萃我今摧頽感歲光亦如殘梅在道旁長紅小白

遜凡艷冰肌玉骨愁孤芳人生富貴百何有不如花晨  
一杯酒白雪盈頭復幾時青山埋骨誰相偶惜梅與梅  
重作別慎葆來春好顏色千秋我亦冷林逋會有閒身  
伴月魄

小憩碧筠山房

片刻名籃結淨緣探春到此意翛然花光白已紛成雨  
竹氣青如別有天客饌半兼旁合果僧廚近接在山泉  
幽棲以此吾堪老丈室維摩共證禪

聞金輿有董香光題梅園二字額無有導者悵然  
不獲見

自昔幽尋地都成草草還殘春非客夢芳徑卽家山往

躡留塵外題名細竹間何時重載酒一洗墨痕斑

荅曼亭

海濱獨處歎匏瓜每向疏櫺見月斜至竟廣平心鐵石  
賦成未必有梅花

羊舌賀貧真達識范文祈死更知幾但教悟徹人間世  
解脫何須化蝶飛

石髓雖然隔太行道心終在白雲鄉蘭因便爲三春結  
豈似風隄絮影狂

半生團扇掩清歌松柏何心施女蘿果是塵緣消已盡  
天花應避病維摩

贈別魯思姪

略如春草步相隨

劉禹錫寄贈小樊詩終須買取名春草處處相將步步隨

長簾空牀兩愴神  
世間難得是佳人  
年來綺語都芟盡  
乞乳維摩况病身

看花霧眼太匆忙  
但覺亭亭似我長  
眉語相煩細評度  
可能三五有星光

引疾得遂解組日口占

李絲轉瞬十年餘  
此日纔能賦遂初  
盛世敢言泉石好  
散材自與簿書疎  
鱸鄉有約期終踐  
棠舍無陰可久居  
爲語甬江諸父老  
情親忽別幾躊躇

海國風高歲易寒  
勞生空復戴南冠  
一身于世終何補  
百計惟貧尚可安  
閣外雞蟲看未了  
山中猿鶴笑無端

折腰久已書生嬾且向江湖整釣竿

半通難脫是塵埃重戴初離亦快哉自覺懸鶉慚竊祿  
誰因服驥解憐才親朋色冷將冰散符檄心驚尚火催  
幾許送迎煩吏版錯從新故費疑猜

已屆知非伯玉年更堪行役路茫然官從將去心彌媿  
身到無求病或痊歸計青山容獨往餘生白屋幸高眠  
潛夫亦有人間論自此榮枯不問天

平瑤海屬寫秋山習靜圖裝潢成卷郵寄索題因  
書絕句四首

誰似先生悟息機朝衫蚤脫製荷衣此心久與山俱靜  
不管人間有是非

吾轂丹朱競入塵道根空現宰官身阿難白佛無多語

能見林泉有幾人

圖中作僧服故云

寫圖吏事方堆案得句閒身已乞休藏向名藍香供養  
此人此畫合千秋

每話師門涕不禁

瑤海爲文知公衣鉢舊情深今朝

敏兄門下士

助我還山去

子將引疾瑤海作書與

白石清泉一例尋

范孝廉莪亭有室曰藥天倪廣文韭山集稷帖字

成七律二章贈之莪亭既次其韻復索同人屬和

予與莪亭交七年今乞休將歸不能無離合之感

因效原體奉訓卽以誌別

文品咸期會昔流室生蘭氣此間幽天將水竹虛相寄

我亭居西郭外門  
繞清溪戶多叢竹

人在林亭靜可修每託陳言爲感遇

倦隨浪迹作羣遊

我亭好吟語多感樂晚  
舉于鄉竟不赴公車

老夫信是彭

之後

曩蒙鑄石見贈  
曰老彭後裔

萬古悲娛悟所由

攬帶能觀世外賢一絲契合亦欣然初無惠化因風暢  
大有情懷與日遷清詠得同嗟異地春山足樂及今年  
也知和曲當時少長向臨觴抱不弦

偕同人再登天一閣觀藏書并披閱金石文仍用  
集禊帖詩原韻

一水嘗隨迹作流迹雖陳矣極清幽室因山氣人初靜  
坐有春風竹自修朗抱可觀當世事暮懷爲慨盛時遊  
羣言管領于斯係快取天和契昔由

與稽猶及仰諸賢盡攬殊形足暢然古趣咸知文在右  
今人每感地將遷引觴暫得無生詠娛目相期未老年  
又是閒亭畢長日所欣俯視曲終弦

甬上諸君子置酒相餞再次前韻

世情若水慨湍流文會欣隨趣少幽觴詠足當諸品集  
山林合向一生修所期化日同彭永或得因風與列遊  
况是此間知已在異時悟遇豈無由

後死嘗悲次昔賢豔爲放誕亦云然蘭言可永人相契  
竹氣能清坐不遷每以古懷興萬感將於初地寄長年  
告歸擬結竹初  
菴以儼風願 自今宇內嗟殊迹託喻春和有短弦

平望夜泊



解組已半載還家裁兩旬仍挂十幅帆言尋越江濱越  
江六百里距吳衣帶水岸語雜榜謳鄉音聽遞改顧慚  
營巢燕尚作遵渚鴻一枕移清宵五兩隨炎風流螢乍  
綴草殘月漸吐空感此獨客心光景無與同憶昔捧檄  
來南枝十年烏綠髻嗟久凋青山如舊好升沉悟萬事  
榮落等秋草荷衣製未易松徑蕪已蚤故園老兄姊詢  
我歸何遲肥瘦互審顏悲喜各有思苦復爲寓公八口  
猶遠羈明知此暫別丁寧弗愆期秋颺最涼爽此路宜  
輕舫徑踐鷗鷺盟長爲桑苧長

武林寓齋早起

乍涼客館起高眠獨上岑樓望渺然山色最宜疎雨後

鄉心多在曉風前夢經桑下猶三宿詩誦河干但一篇  
寄語明湖好相待重游便擬挾飛仙

復至甬上

宦游于此九星霜重到情親似故鄉夾道尚聞評面貌  
逢人暫與問農桑江山信美都陳迹文酒無多記夕陽  
臨別殷勤屬賢宰好培新綠及甘棠

過天一閣訪范上舍遜齋兼懷周秀才鐵厓

尚憶河干別重來竹屋遊人閒卽支許客簡但羊求雅  
尚符縑素深情感贈投拳拳煩令子期爾作琳瑯

遜齋足不

不良于行輒遣  
子過存意甚厚

又抱遺珠歎周郎海上才論文見冰雪感遇及蒿萊種

菊籬將晚看山屐未回相尋不相見虛館幾裴裒

贈別范孝廉莪亭袁秀才陶軒

行雲本無心亭亭在天宇歛散隨大化以岫爲出處人  
生搏沙成所遇得儔侶合乘萬里風離作九秋雨諸君  
甬上彥于我敦蘭茝昔去勤攀留今來款笑語溪山晴  
揖客信美非吾土豈不念友朋烏還倦其羽

賤子構散材夙具山澤姿一行遂作吏捧檄緣烏私百  
里古小侯敢云墨綬卑澤物不自主於道多所違行前  
易亡羊慮久失素絲晉平求歸心非必籌山貲貞疾老  
牖下動靜庶以時

海國多悲風寒城易頽日重游感歲序百卉婁以栗七

年尹茲土爲治多闕失邦人信淳厚再至不見嫉水庸

或乖方士氣貴責實胡爲舍根本徒以歎枯菀

今歲秋試南北

開祇雋一人有志局擯斥之人挾前憾謂子濬郡河

復三喉爲不利于科第者或從而附和其說故及之鴻泥無定蹤仕宦况殊術善後惟其人吾心太空物

松栢千霄材見用每不早槁楊崇朝長作棟懼裏裏窮

達偶見遭富貴烟霧掃惟期履如砥愛鼎得吾寶丈夫

好身手千載在懷抱其生倘若浮其死恐遂槁古人重

贈言臨期豈草草願以金石心令德爲壽考

### 過東關市

頻年入剡媿塵顏今日扁舟真箇還千里暫游仍對月  
一身無罣且看山清溪似送歸帆穩白鳥應知過客閒

定有鄉閭計程望霜華休點髩絲斑

晚過蕭山郭外

幽行如畫裏  
暝色半帆分  
野水自成渡  
秋山不礙雲  
歸禽多作勢  
涼杵易相聞  
坐覺吟情澹  
吾真鷗鷺羣

竹初詩鈔卷之十五

武進錢維喬樹參著

姪伯垌

中錫

編次

子中鈞

孫潤斯  
漆斯

校字

袁簡齋知予歸田枉詩存問率成四章奉訓

海上秋風江上尊塵衫久已悵迷津竊公故智裁今日  
勸我抽身有幾人世事楸枰留黑白老懷薑白雜酸辛  
退閑自此陪褰屐長作田間識字民

聖世巢由敢比肩不材竿濫已華顛向生五嶽應嗟晚  
葉令雙鳬豈易仙前路所期惟撰述餘年莫負是林泉  
蔡凝小室人休晒一樣忘機賦樂天

越水吳山舊夢涼一門求點並徜徉

簡齋弟香亭太守同爲白下寓公子

亦與仲兄並處里門境畧相似

道存定覺浮榮賤身退彌知化日長平

子四愁因報贈彥瑜三好最篇章若論此際酬招隱便次中行亦猖狂

勞生那復計年華歸識吾生本有涯未定新巢同燕子

早營孤塚付梅花

子搆數椽未葺而東郭有兆域亡妻二人已就殯矣

千秋欲借

先生筆十畝從添處士家他日並登皇甫傳始知真契在烟霞

題趙舍人味辛寫經圖

我交舍人卅載餘稔其孝行今所無昔過倚廬唁失恃每見骨削含欷歔夜必居外食惟疏炷香展几全跣跣

爲母寫經十指枯以誌永慕繪作圖人生親恩洵罔極  
夕饘晨羞豈長得緋紫離身係戀多素衣一脫誰還憶  
鯉庭君有百歲觴我悲風木都茫茫薄宦歸來具三鼎  
鮮民雖活如秋霜貝葉千篇亦何用聊寄孝思難減痛  
君不見啁噍燕雀欲報恩惟有飛翔化威鳳

題楊秀才麗中漁樵問答圖

我不爲樵夫不談王道笑士迂我不爲漁父海上釣鰲  
圖進取丈夫抱負非庸凡窮達隨遇曾何嫌有時錦茵  
及丹轂亦可短笠兼長鑣北山之北南山南疎林紺紫  
溪蔚藍此身巖壑任所置于世風月差能諳城西草元  
者其才姸羣雅感遇猶沉淹作圖貌瀟灑孔聖人山水



並樂符智仁陶處士影形相答悟物理歸田我爲太平  
氓如薪已朽魚已頽君則盛年富事業豈以閒放忘蒼  
生定知偶爾寄幽抱靜養襟期匪枯槁絲繡取直斤斧  
堅藏器待時君有焉

題洪孝廉稚存城東訪月圖卽送北行

堞痕塔影兩微茫滿紙生烟竹樹蒼正是勞勞送人處  
臨期贈與好秋光

朱門蓬戶本無憑受命何妨夕飲冰一樣長安有明月  
垂簾爭試九華燈

歸隱我方營白屋壯遊君豈有青山從今黃葉城東路  
若個清宵得往還

一徑空明苕蓼鋪  
朗吟便擬踏冰壺  
不知銀燭朝天夜  
還憶江鄉此景無

黃山姪忽繪一好女子自謂小像屬人賦詩因爲  
系以長句

才士不遇時懷怨等寡女彩筆徒生花蛾眉詎能語西  
施一入館娃宮新粧炫服殊凡庸邯鄲嫁爲厮養婦雲  
鬟潦倒如飛蓬遭逢豈但有遲速李杜文章不科目易  
者鴻毛遇順風難者牽舟上平陸吾家阿咸千里駒頭  
顛三十悲窮途罵坐時傾灌夫酒高歌欲碎處仲壺忽  
然發奇意尺紙作變相窈窕彼誰子詭云我輩行君不  
見博浪沙中狙擊人觀其狀貌乃與婦女倫須眉如戟

絕無丈夫氣世間顧臣媚子何紛紛上將軍門受巾幘  
陳王傳粉舞對客休論大道在致柔跌宕形骸亦狂德  
重兮重兮于汝方華年蹙爲雌伏莫惘然五光十色會  
流露藐姑處子終成仙

梁溪徐孝廉朗齋屬題星臺乞巧圖

倒屣虛勞名紙來新圖尺幅見清才自慚已失文通管  
正逐吳兒學賣駢

桐陰覆地淨無塵獨展心香月半輪底事生天須慧業  
此身便合化星辰

笙弄新簧錦彩攢智珠不獨競毫端只愁萬事紛紜甚  
已費靈娥斂手看

方寸靈臺炯有秋七籤爭向碧空求至人不在雲霞表  
願室羣門拜孔周

題畫贈友

經年別夢感苔岑獨對空階雨氣深只有秋山青數疊  
蕭然猶似故人心

袁簡齋年七十六以曩日相士之言決其當死自  
作挽詩走札索訓爲賦長句廣其意

不爭千秋爭一日人人怖死色戰栗精靈不寶寶形骸  
求仙無成便佞佛簡齋先生有道人頗知大患爲有身  
尺書忽然投我戶作詩自挽將返真我思人生修短曾  
何殊百年共此旦宅居腰金皓首戀黑夜別璞早歲遊

清都如蟬飲翥在霄露例以軀殼歸泥塗儒云天壽貴  
不貳釋借輪劫警彼愚上士聞之一大噓恬然任化奚  
拘墟我爲先生編傳志處則才人出循吏卽今齒髮過  
懸車已享林泉如隔世世人孰肯寡所營逃陽卻曲傷  
其行瓦雞陶犬競鳴吠告以速朽瞿然驚人惟畏死乃  
易死譬若憂貧貧不已存爲縣疣亡決疣右執法華左  
老子古之至人符太虛啓期三樂猶贅耳先生謂我才  
必傳我引爲重聊自堅師其勇退及嗜學所不能到還  
之天命躔磨蝎友所歎昔鄭誠齋太史爲子推算謂命  
躔躔子弗躔磨蝎友所歎躔磨蝎宮與韓蘇同功名恐多  
以介懷躔磨蝎友所歎躔磨蝎宮與韓蘇同功名恐多  
身伴粘蝎住偶然視之亦如傳舍耳佳城  
豈必待回首直以行殯爲吾年我知先生之胸極灑灑

更爲先生浮一竿但臻上壽何足奇令子知能永風雅  
隨園花木冬復春有梅成梁松化鱗十二時當百廿旬  
小年大年皆烟雲莫學君家山松未曠達高歌猶覺行  
路辛吾將與爾共作無懷民

題吳門袁節母竹柏樓居圖

禮載耐女君記云不夜哭所天義無殊後死貴自勗昔  
人垂婦式其艱在嫠獨嚮閔當百辛往往仰天祝何況  
同穴期大化有遲速孰能酬夙願不爽眇應胸岑樓倚  
秋空環植柏與竹誰歟繪此景永慕出莪蓼母節倅寒  
筠母心比堅木撫孤迨成立歲月亦轉燭力却堂前觴  
竟化地下鵠歿寧由素志造物殉所欲惟餘畫荻居長

愴望雲目披圖森翠靄髣髴鳥嘯屋想見鳴機人蒿簪  
一燈綠彤管集籤軸孝思猶未足持此勒貞珉以當女  
史續

爲畢處士焦麓寫秋林宴坐圖并題四絕句

幾年席帽走神京是處高軒倒屣迎不愛朱門愛蓬戶  
故山一角有餘情

每過城南訪隱居百竿修竹一牀書定知高士胸中物  
只有烟雲共卷舒

竹樹成幃草作茵臨流箕踞亦天真得閒莫道尋常事  
多少紅塵撲面人

石交半世締心知都是人間老畫師一紙貌君巖壑內

筆端幽處畧相宜

爲楊比部六士寫泣硯圖卽題二絕句六士先有  
授硯圖屬題序見前詩

一硯摩挲爲北堂悲思不待墨磨將試看淚眼添鸛鴒  
便有文心化鳳皇

烏衣舊巷記依稀曾見庭前孟母機料得省郎魂夢裏

一株紅杏是春暉

比部舊居烏衣橋畔庭有紅杏太夫人手植也

題孫尉邦翰幽澗鳴琴圖

平生未能解琴理案節差堪識宮徵但如高士無一絃  
何必名工勤十指憶昔匏繫南海濱天風海水吹我身  
成連咫尺不可見翻然歸浣縵衣塵孫登本自耽長嘯



亦棄一官遊越嶠銜杯頗足擬同音分袂俄看成別調  
安道不爲王門伶雍門多彈激楚聲江湖散朗容我輩  
青山綠水皆移情姑蘇臺畔芳菲歇張筵爲我清謳發  
樂終出示一卷圖泉韻松濤動毛髮君知里耳無古今  
空山獨往深復深明嶽善手久絕響人間箏笛徒哇淫  
我能弗鼓中悄悄大溫小廉含寸心有時野服還相尋  
趺坐共契黃童音

簡齋枉顧草堂以辛亥除夕告存詩見示奉答絕  
句四首

春水初生客到門坐看玉貌轉溫溫書簡從此應無算  
添得新詩月告存

飲罷屠酥爆竹譁依然老眼又看花天留一代靈光殿  
肯使唐生口漫誇

湯稱續命人間少稻可翻魂海外求何似長年飽餐飯  
詩翁心氣自千秋

抽簪悔不十年前恐步高蹤命未堅今讀蘭陵非相論  
也希白髮占林泉

盧學士抱經以壬子歲重遊泮宮詩索酬爲賦二  
律

耆英江左重靈光曾傍星辰侍玉皇

學士爲壬申進士第二人

又見

材皆成棧樸從知人足重膠庠青衿發篋新名刺白首  
讐書舊講堂長與儒林爲祭酒豈惟頻聽鹿鳴章

後漢書永

平十年明帝幸南陽名校官弟子作雅樂奏鹿鳴是學校娛賓之什非如近代專指鄉試也

眼區朱紫老逾明海內羣知向朗名定使千秋稱學者已如再世作經生湖山秀起憑諸子典籍功高在五更何必人間推北斗門閭通德是康成

趙舍人味辛屬寫溪山秋靄長卷並題絕句送之  
北行

頻年江國共盤桓君正彈冠我挂冠一紙秋聲贈行篋鱸鄉如此畫中看

玉堂此去入仙班多少新吟枚馬間何事臨岐促王宰故人情重在青山

寄賀趙舍人生子

犀錢玉果賀充闕一紙天邊快有餘只恐君如商子木  
舍人詩有已嗟歲月過商瞿之句教人屢錯弄麀書

抱送頻年入夢訛木樛今果勝江沱人間珍物非常物  
得稍遲難喜較多

蜚聲蚤歲躡青雲一事偏輸與卯君此後門庭添鼓角  
好看玉樹兩階分

半生鉛槧最心勞曉費研朱夜繼膏能讀父書今有種  
百城從此更堪豪

浪暖桃紅日正融迎將畫舸趁春風遙知錦葆長安邸  
多少人看翦水瞳

寄荅管韞山農部見懷之作

春風吹到故人書正是柴門病起初  
噩夢未能除宦海停雲差喜護幽居  
論交日下情偏重招飲山中計未疏  
近學向平耽讀易直從損益悟歸墟

一臥蓬蒿歲月馳青松白石盡吾師  
已嗟入世毫無補况近衰年百不知  
東野雲龍雖願結北山猿鶴恐文移  
惟應息壤盟江水頭黑看公衣錦時

題汪山人心農試硯齋圖

隨園之叟老著書心農其友亦宿儒  
齋成試硯爲作記文不損美亦不諛  
不知其人視其友况我神交耳熟久  
一緘徑索作長歌特向陶泓三盥手  
人生嗜好何止萬與千其尤雅者縑  
素緣珠光劍氣轉瞬没不若石璞能

完堅豈無玉堂龍尾誇精研用濡大筆燕許篇三災暗  
遭穎士笑轉遜墨守蓬窗前心農蓄古胸成癖神物投  
知天不惜一規溫潤呼含波什裹摩挲香滿壁高齋日  
暖春風生綠陰如畫竹氣清開簾麝薰郁以散拂案蕉  
尾鏗然鳴主人愛研手不釋研亦榮于加九錫椿柳重  
添致爽楹尊藝欲奪蕭閒席更乞才人爲潤色好句貞  
璣期不泐匹練吳門飛水碧紫雲蓬蓬覆君宅訪戴他  
年求卽得

甬上范孝廉以倪文正張忠烈詩畫筵裝潢成卷  
遠寄屬題爲賦長句

人有一死逾泰山遺蹟愛重留人間豈惟蘇節與段笏

雖小翰墨神所環范君嗜古夙成癖手羅名賢札盈尺  
尤于忠孝三致意一字之珍如拱璧千里馳來雙筆奇  
文正畫與忠烈詩蕭齋展視白日黯中有正氣騰蛟螭  
昔當明衰九鼎移南都草草勢不支龍髯攀號已無及  
田橫一島何能爲兩公大義不再述嗟此淋漓兩絕筆  
拳石能含太華姿幽吟疑挾風雷鬱倪畫草叢有介石  
卓立張書江上聞  
笛此草非耳其蓬麻聞笛非笛爲悲笳偶然揮灑墨墮  
瀋碧血滲歎生槎枒吁嗟乎兩公授命雖先後氣作白  
虹俱貫斗百五年來宰木蒼落日荒阡狐兔走此卷多  
君璧合功護持莫遣散霜風不見西臺慟哭孤臣記能  
使千秋淚眼紅

送湯明府春叔釋武進篆之吳門

使君爲政古循良墨綬躬紆惠此方行野每敷三尺雨  
退衙仍展五經箱秋高范釜唯餘粟花發潘輿偶舉觴  
載詠白華眞孝潔朝朝燕喜到諉堂

地當赤緊正需賢借寇巖疆竟五年迎送敢辭馳露冕  
寬平每只示蒲鞭盡除竿牘門如水獨撫琴尊吏是仙  
一勺蘭陵春釀熟嘗來便抵隱之泉

貧安耕作富無驚惻惻如公豈近名但解字民爲衆母  
不工獲上本書生園扉第草刑常簡橫塾增廡教易成  
西郊有義學明府捐廉更有餘恩及枯骨松楸千載表  
俸置田百畝以贍生徒  
仁聲又置義塚一區爲掩路埋揚之所



天教萬口作豐碑荆玉南金非譽詞衆愛倍殷將去日  
清操無改乍來時何人獨識陳亭長當代猶存陸浚儀  
多少攀轅童叟意棠陰盼祝有餘思

題蔣秀才徵菽雨窻讀史圖

微霜墮平臯疎雨洗衆竹商飈倏以至吹我數椽屋誰  
歟岸幘坐其人美如玉結髮稱奇童清才已拔俗詞壇  
近蜚譽便便益盈腹選勝求幽居探奇豁朗目上下三  
千年縱橫一萬軸頻薰班馬香如賦韋杜族寧同俗儒  
陋撐腸但藜藿亦異石隱流荒徑守松菊秋高樹拂雲  
羣籟起林木想見抱膝吟怡然百城足三長古所貴四  
部君已熟終當紅袖拂爲列兩行燭

簡齋八十壽屢索詩未應今聞彙集暇詞付梓戲  
補二章爲殿

獨占林泉五十年此身已證地行仙要令遠海求文字  
豈但名山有簡編眼閱四朝鳩杖古心兼三樂鹿裘鮮  
人間多少邀題品得既殘膏便上天

好句紛紛頌此翁無言誰識可叅同大名久冠羣英表  
上壽宜全太樸中我已支離侔病鶴公猶奮迅等翔鴻  
掩關靜聽秋聲起萬竅喁于不礙空

吳上舍寶書屬題垂髫小像係其尊人所寫也  
妙手長康譽久馳偶將粉本貌佳兒一編詩禮分明在  
想見趨庭玉立時

風木人間最愴神  
白華空復感經春  
羨君乞得循陔影  
出水當風總性真

驚才早歲噪詞壇  
翦水雙瞳墨未乾  
愷拜父書敷泣扇  
旁人莫作畫圖看  
平泉磐石對斜暉  
人坐蘭叢自不羣  
常向生綃懷手澤  
好教面目永清芬

題于刺史滄來婁東施粥圖

偏災海國昔曾侵  
賢牧恩垂感至今  
布澤如斯仁有術  
活人無算力能任  
一圖鄭俠堪流涕  
萬戶黔敖早動心  
多少宰官身示現  
願推此意及林林

于刺史來攝毘陵郡婁東人士繪圖送之彙成吟

卷因次家竹汀詹事元韻題贈

側聞婁東有神君士沐化雨民熙春忽然五袴歌滿耳

春風吹到戔戔輪象賢世胄昔所企刺史爲襄勤公曾孫典郡雅

度今無倫攀轅彼界固衆口跨竹此土方多身公來肅

拜兩家廟淵源敦篤皆天真公父紫亭侍御爲先文敏兄門人公復爲劉文定所

取士下車之日卽分詣家祠展謁詞意肫摯具見古風以此厚德播作政有不愷

悌善撫民但攜琴鶴伴吟歎肯爲裘葛分涼溫新詩出

手韻金石賤子蹶起寒螿呻因思佛乳悉可潤一燈徧

照何所分預期借冠且經歲俾我桑梓風還淳

題莊大尹京少松陰獨坐圖

廊廟江湖有夙因烟霞難證宰官身且教小試爲霖手

再向青山作主人

塵事紛紛未竟棋  
墮中蕉鹿幻難知  
寓言十九從何悟  
只在無言宴坐時

出山便作還山想  
擁笏常存拄笏心  
可要江臯留十畝  
清泉白石待幽尋

喬柯自抱千尋節  
野菊常含三徑霜  
解得詩人心似水  
天涯何處不斜陽

爲戴觀察補南山逸興小照集陶句題幀

世間有松喬誰謂形蹟拘  
不爲好爵縈心念山澤居  
草木得常理棲遯固多娛  
達人領其趣少許便有餘  
飄飄西來風清涼素秋節  
芳菊開林耀青松冠巖列  
緬

然睇層邱雲駕庶可飭真想初在襟茲契誰能別

祝費中丞芸浦六十壽

天南辰燦月嘉平崧嶽神推間氣生裴令殊勲唐節度  
路公高會宋耆英政因不擾民咸悅德以惟清化易成  
他日石麟堪濟美萊衣更奉百年觥

雙旌出守媿河東桑梓曾叨樾蔭中慈惠至今歌呂父  
廉平當日重吳公星軺察吏壺關遠露冕來旬洱海融  
到處甘棠思芟舍豈惟牛斗扇仁風

久將節鉞待名臣暫乞蘭陔孝養身萬里竟歸完愛日  
百蠻重撫復陽春吳雲正戀旌旗繞閩樹剛移雨露新  
畢竟江南宸注厚福星長照慰斯民

桂枝猶記昔同攀周甲都看髮漸斑許識夔龍近天上  
却憐猿鶴在山間黃扉佇見沙隄築紫禁先傳玉杖  
頒大斗竊隨芹獻後定知仁壽駐丹顏

爲莊徵君印山題攝山采藥圖

名山如高人嶽寄自今古亦如貞士貞靈氣不輕吐晦  
寧假泉石顯豈藉珪組蘊此觸石雲一朝可霖雨我友  
漆園子其品邁儔侶千時久未遇璞玉尚泥土淳行播  
里閭元纁降大府終焉掉頭去不效躡足舞示我七尺  
縑命意蓋有取人生匪金石天地一逆旅徒爲積勞薪  
誰學善息弩期全松柏堅須耐苓蘘苦不然但酣豢卒  
與草木腐我聞鍾阜名勝境難悉數琳宮七十餘緇素

半錯處綠葵與紅蓼不用白石煮水號八功德况使沉  
痾愈惜哉置青鞵頽髮枉延佇君才異高蹈肯與鹿門  
伍且劖黃獨苗慙伴青鵠乳此身苟可用吾道終見許  
但保壽命長聊爲烟霞主興公賦台嶽太白夢天姥作  
詩三太息清夢浩無所

爲華太學雨堂題文待詔紡績督課圖卷子

至正初張

路公翥爲華栖碧作春草軒記吳仲圭作春草  
貞節圖卷載鐵網珊瑚中有元季諸名士題詠  
仲圭圖不戒于火文待詔補寫此圖並書路公  
記今華氏子孫以文書勒石裝潢其卷藏于宗  
祠

天爲清門表潛德三尺剡藤蝨不蝕文孫孝思力求得  
與堅珉垂永無極初圖創自梅花菴踵以玉磬模此函



紡者節母侍者男用啓望族梁溪南蓬門蕭蕭日將暮  
松耶柏耶雜嘉樹投筐一縷書百句世間閱閱不知數  
寧識植根悉寒素春暉寸草報有時名賢琬壁堪箴規  
五百年來神所守彼丹朱轂亦何有

徐上舍芝庭自金陵寄贈梅樹詩以酬之

商飈乍掃九衢塵荒徑愁聽落葉頻一紙故人芳訊到  
小園先助十分春

猿鶴驚餘夢未安數椽猶幸醉中看贈來甘本林逋樹  
知是君心重歲寒

味辛司馬以壬子歲所贈山水卷子屬題復成詩  
四章卽送之官山左

舊墨重披已十秋互看霜雪漸盈頭送君又向青齊去  
紫菊紅萸助別愁

如此清才不石渠折腰今是入塵初買山不爲躊躇甚  
笑整萊衣也自如

治裝尚有觀濤興捧檄聊爲遵海行莫道冷官詩酒便  
儘堪霖雨及蒼生

衰病頻年只掩關所期十畝共閒閒鄭公檮散君須憶  
待寫歸舟天際還

屠君端立髻齡嗣于叔其生母徐孺人家貧無以  
爲炊君每午飯潛攜所食歸以遺之嘗忍饑終日  
不令人知未中壽以羸卒其子南孫屬畢蕉鹿爲

寫菽水盡歡圖以誌追慕同人賦詩予得展閱敬  
題斷句

考叔遺羹稱至孝陸郎懷橘號奇童豈知每飯縈冰蘖  
更有含饑費苦衷

永慕天教素行完顯揚最是令名難此圖能使人心動  
定有華堂忍淚看

數椽茆屋起晨炊中有慈烏反哺遲五鼎三牲應不少  
爭如杯棬奉生時

休將修短問穹蒼赤子心全與世長爲語學人休遠覓  
知親餽處是天良

題石翁深山獨坐圖

天在山中以畜德山下出泉以果行含澤布氣調五神  
仁者樂之悅其性終南捷徑人所嗤三年畏壘尸祝之  
由來曠達在胸次非假託跡矜幽奇石君挾術師軒岐  
身居塵市衣不緇擬將松石伴褰屐便借雲氣靈須眉  
我亦歸來羨高士小築未令猿鶴笑士安晚復苦風痺  
宏景虛聞撰真誥知君活人有至誠隱山那許成逃名  
微詞雖媿柳州傳焚券還期似宋清

題畫扇贈楊明經麗中

細柳新蒲易染塵都將行樂趁佳辰老夫別有深懷抱  
一雨悲思造物仁

平添詩思入毫端竹籟泉聲五月寒獨掩蓬門無個事

畫成只合素心看

爲印公子鴻緯題前蜀王鐫書法華經殘葉

佛法度衆生大旨在救世亦與治道同自他貴俱利彼  
教得小乘如國之偏安不能包民物趨有餘涅槃何況  
書寫末僅博肉眼觀蜀臣鐫何爲翰墨韋張倫麟鳳詎  
足瑞戈甲方如雲平章爾奚事貝葉繡空文差勝甘州  
歌難弭青城軍一朝降表出劫火摧風輪妙法蓮華經  
六萬九千字普爲人天筏字字圓頓義然而說法心譬  
之月在指悟則獲寶珠迷則翻故紙殘本競流傳閱十  
四甲子我云一刹那大藏悉如此真贗不足稽文字本  
如幻背脫宰官手今作居士玩願以迴向心觸緒求彼

岸片片析旃檀餘香滿震旦

題呂貞女傳後

呂節若妹爲  
蔣斗燦守貞

昔聞烈士著奇節阿姊大呼名不滅今看弱女持綱常  
阿兄作傳揚芬芳閨中自昔多芳躅倚柱磨笄淚相續  
嗟女宛轉爲其難貞耶孝耶厲風俗 聖朝寬大旌典  
優室女抱義例亦收青松凌寒柏挺翠遜此稗質蘭苕  
幽會見天風表荼苦兩髦之髡足千古我爲拈毫動哀  
魄霜蘚打窓蛩四壁

壬戌八月就醫張舍假館秦氏秀野堂偶成

歲除曾此臥羊裘

去臘亦寓  
此度歲

又拂塵窻對九秋人以避

喧成伴侶

偕來者爲莊子  
義門劉子鐵文

地雖近市帶林邱頻來易假

陳蕃榻小住仍兼張翰舟何必淮南賦招隱草堂日日  
桂香浮

萍踪不止住三桑看盡平岡下夕陽因病却思醫國手  
離家差得養生方蛩螢四壁殘檠黯風簾三更客夢涼  
何日蓬衡竟棲老龍游馬蹟本吾鄉祖居段庄去此纔數里

過從所喜合苔岑

舊交吳麗川黃樽酒連宵話不禁世樂亭晨夕相晤

事怕聞惟塞耳秋光易老最驚心荒村士有陶漁氣古  
屋人隨烏鼠吟莫厭聽風兼聽雨白頭所幸尚堪簪

一廬暫寄足優游倚杖柴門景物幽是處瓦盆喧蟋蟀

有人錦鄣愛驂騮

二事皆書所見

雨暘難愜三農望

聞田禾爲風雨所損

衰賤偏含萬古愁所願太平腰腳健家家俱足稻梁謀

過青雲菴作

數行烟柳欲參天小寺門臨畧徇邊每過溪山疑昔夢

却思魚鳥樂殘年慈悲徧及褰裳客

橋爲昔僧所募建免病涉者

香

火惟資買卜錢

菴有跛僧善卜易

我欲就中尋老衲蒲團一宿

話因緣

偕義門鐵文至段庄口占贈曾思姪

平生清夢隔湖鄉三度今年過草堂屋角檀園千个綠  
門前穉榘一畦黃弄孫母自忘藜藿款客妻能具酒漿  
我邇阿咸無此樂欲隨農圃老秋光

重陽前二日將自張舍返棹贈別黃子樂亭

十年促膝意相親就乞刀圭得比鄰敢以衰殘資物力



樂亭頻勸服參劑

却於淳愛見天真相過蚤晚容無倦每謝盤

餐餽自頻海內卽今多疾苦欲君妙手徧生春

小庭桂又兩番花駒隙光陰信有涯婉變堂開聊永日

次女亦以視疾至同寓後軒

聯翩艇至似浮家禪心并斷維摩乳睡

思差宜真上茶多少征鴻遠謀食嘹嘹霜外數行斜

洞垣誰復徵人情癥結無端爲利名盧扁非能噓白骨

通苓亦可救蒼生一彈指頃觀碁局

義門好與人對奕

三折肱

餘悟藥鎔我已匡時媿良相惟應賣卜學君平

適于魯思慮攜

得占易書

歸田早擬住柴桑老病今纔愛入鄉世味熟嘗閒最好

交情細驗淡方長料量食餌消簾暑檢點詩篇借燼光

天恐吾儕感風雨一鉤新月上高牆

有餉盆菊者其中紫白霓裳二種最佳置按頭兩  
月餘而鮮妍如初爲賦小詩

始從盆盎餉秋光已臘嘉平葉未黃應是天公念幽獨  
特留霜影伴紫桑

數枝對舞態橫斜耐久偏於艷色誇著到重裘看未了  
從今號汝歲寒花

小園逝景感如流喜借餘英媚白頭好與南枝疎蘂接  
一時香可備春秋

竹初詩鈔卷之十六

武進錢維喬樹參著

姪伯珂

中錫

編次

子中鈞

孫

潤斯  
溱斯

校字

戲作長句柬魯思姪

今年正月春雷早土脈先應萌  
庶草今年二月春陰多  
高柯寒勒昨始和小園有竹不滿百  
呼僮日偵根未坼  
經旬戢戢纔數枝急攜長鑱喜初得  
人生口腹皆天真  
但下喉嚨何所分何曾萬錢自饜飫  
公綽一器通艱辛  
老夫愛竹兼愛笋欲使撐腸滿瓊粉  
恨無千畝傍渭濱  
嚙渴徒教強舌本却思湖濱小阮家  
雨後犢角生如麻

暮看含苞曉解籜大可佐饌小煮茶分甘定復念癡叔  
好遣阿段劇數束三餐堪助太常齋一割勝遺細君肉  
汝既不瘦我不俗胸中各有萬个竹但能下筆走風雨  
便抵探囊富金玉練珍多少朱門人笑我嗜好何清貧  
世間榮悴安可論昨衣孤白今結鶉

舊藏素心玉軫蘭皆爲春寒所敗僅存次者二盃  
花時移置案旁詩以慰之

夕露晨風護惜長差留弱幹點秋光當門已恨無嘉種  
入室猶容得古香綺席幾家羅鄭衛近鄰有張蕤集  
女伶甚宣熱荒  
齋一縷託瀟湘唯應少許能醫俗不羨花叢富貴王

眞賞從來在素襟尚餘老眼看侵尋也知空谷難爲偶

縱列閒階別有心靜對恰當秋瑟瑟微吟漸覺息深深  
人間薺麥應何限肯向幽琴變古今

悼序東姪

半生書劍作狂游七十居然得首邱儘有賓朋知意氣  
竟於江漢畢窮愁篋中遺草三生業湖畔閒雲八口謀  
羣從一門君最長不堪灑涕感浮漚

題龔徵君楚香玩竹圖

嘗聞竹虛中虛則能含清又聞竹直節直則能守貞其  
貫四時而不改柯葉託始在數寸之萌蓋此君之拔俗  
實稟質於初生然而竹不俗竹亦不孤獨植之桃李叢  
森然有淨綠誰歟寫此圖發自歲寒意聊觀化於流泉

以寓其干霄之氣竹兮竹兮設汝成林弗爲高人之避  
匿而徧其心設汝作杖弗爲達官之所規圓而革其象  
我聞老氏言和光而同塵噫嘻俗可勝醫乎吾但自葆  
夫幽筠庶幾哉天之民

題李廉訪曉園續蘭亭修禊圖

昔年謁公武林城莎廳琴鶴清風生今年見公蘭亭曲  
舊蹟新題貌如玉公之眉宇真紫芝披圖颯爽恍遇之  
竭來三吳秉繡斧秋霜冬日民就治古人才大無不有  
豈以勲名束身手安石園池勝集多少文山水願懷久  
頗聞澤國藏萑苻春霆一震禽厥渠能除稂莠護嘉種  
寧不閭井歌來蘇猶於燕寢耽風雅修竹茂林長在把

卷中我畧識數人大抵材皆出公下我於名地殊少緣  
未及泛觴曲水邊童而趨庭長游宦剡溪如夢徒茫然  
千四百載韻事傳後賢何必非前賢但令蒼生被霖雨  
卽是青髻爲神仙展公此畫幽情起六月涼飈拂窓几  
且從高枕臥羲皇衮繡他時覲之子

見劉生鐵文和兒子寄贈詩卽用韻柬之

古人重石交相期可耐久今人愛市道谷風十嗟九屈  
指磊落才無能出君右不逢阮籍眼但指謝瀹口我昔  
羈塵中亦爲牛馬走如玉溷泥沙敢與燕石剖歸田飽  
藜藿恥附羶蟻後老病軀幸存道心天所賜感君念岑  
寂節序常聚首窮達當齊觀陳跡悉芻狗一笑小山花

扁舟倘來否

意有所觸復疊前韻

浩劫乃甚速刹那亦良久齊物無大小寓言可十九自  
我杜蘅衡法華執手右入道媿無心違俗任多口悟彼  
世事幻團團牛磨走明知枯碁理黑白戒深剖一昨序  
炎蒸軒庭豁前後商飈修焉至漸欲墮北牖庭花每朱  
顏按鏡易皓首天邊待鴻鵠門外斥雞狗且復盡一觴  
莫問醉與否

題畫贈楊隨安

遠山層疊樹扶疏秋水閒房自讀書靜對幽禽碧空去  
此心與物共如如



題畫贈景明壻三十初度

布帆安穩在鱸鄉  
竹籟泉聲護草堂  
人與碧山俱不老  
年年對影占秋光

題畫

道人非是愛禪關  
藉遣塵心可駐顏  
試看白雲紅樹外  
鐘聲何歲不秋山

楚香徵君以詩見寄次韻酬荅

新詩一紙翦繁看  
太息良朋重歲寒  
塵海定知懷抱別  
蓬門自媿夢魂安  
驚流北走鴻千戶  
轉漕南來水幾竿  
君是書生濟川手  
急將三策上高官

書中畧言河北隄決狀

復次前韻寄莊大印山

經年梁月夢中看爲憶征裘又戒寒遠道悲風易搖落  
故園修竹尚平安空嗟人事同巢幕只合詩篇伴釣竿  
三復河干伐檀詠幾人縣特媿居官近得君書以課學無功擬解館歸里  
長至前一日初雪而案頭供菊一盞種曰秋江幽  
妍如故口占以贈

一枝看袖手清夢憶籬東名借澄波得香猶冷幕通傲  
霜兼傲雪非色亦非空知爾含貞意誰將晚節同

印山歸里過訪並攜楚香疊前韻再寄之什率賦  
二章奉荅卽示楚香

款門成一揖喜見素心人書劍仍前日風濤有此身談

述豫工隄決之前南河亦頗危險縉衣容直道白首重交親且共寒檠

話驪歌易早春

杜甫諸侯客夷吾江左才衣沾淮雨久詩入澤鴻哀小  
病刀圭易楚香札中深愁羽檄催知君感時事徒夢故  
園梅

聞味辛於淮浦敗舟臥具都失率成寄信

屈指天寒盼棘人歸裝忽報付波臣一官已退猶多患  
十口能全若有神索米焚蘆成小住浮家琴簟本長貧  
却思千里黃流溢幾許鴻磬失所民

梅花

今年芳訊早不獨發南枝以爾伴幽寂相看感歲時春  
先殘雪外香與故人宜數徧垂垂影天寒多所思

送魯思姪昆季返段庄

歲晚輒嗟別東風勸少留花纔供索笑人復去扁舟節  
物歸殘髻吟尊惜敝裘殷勤囑羣從終結老農儔

除夕誌感

又聽庭除爆竹聲流光一寸燭華明屢豐幸復成今夕  
貞疾聊期畢此生世味飽嘗雖漸淡道心中立竟何成  
眼前且共團園話莫厭厝厝次第傾

甲子元旦

昔我六齡逢甲子一元重見歲華新心慚赤血孩提日  
命負蒼生立達身夙業難銷無量劫餘年願作太平民  
幾希安得從辛擴是日辛卯辛者更新之義物我同歸大地春

偶成

枯腸從此罷搜尋刪却箏琶悅耳音  
試聽蕭蕭窗外竹  
偶因風過竹何心

壽吳母七十

貞松天與不彫姿翟茆鄉邦著母儀  
晚歲板輿宜國士  
中年紗幔儼經師舞隨萊子能先意  
檄捧毛生敢後時  
令子階一盞預斟春酒熟  
慈雲從此兆期頤  
將謁選

丙辰歲偶作秋樹一幀贈像啓姪巖兒愛而留之  
爲題小詩旋失去茲景明壻購得相示故物儼然  
倏經九稔矣因復題斷句二首卽以歸景明

閒情偶爾寫秋風尺幅誰知類轉蓬  
我已天懷忘得喪

試叅蕉鹿到墮中

世間萬事等霜葩  
畫癖書淫總有涯  
幾許文窻手研染  
百年知落阿誰家

貞女吟

徐女幼許字管氏子女年十三而管氏子天家人秘不令知父旋設有媒氏來議別

姻女聞之大慟以死誓年十四卒歸管

東海有女揚休名  
垂髫烈烈完一生  
丈夫婣姻聞之驚  
松栢茁土性含貞  
女未知夫識夫姓  
但有夫姓身已定  
我儀我特父所命  
黃鵠歌成守其正  
存未結褵沒迎歸  
賓戚觀者爲淚揮  
女行慨然顏不悲  
蒿簪縞裳生光輝  
無婦有婦舅姑喜  
女亦無子而有子  
孝慈兼備延厥祀  
空閨百年匪徒死  
吁嗟乎無禮之禮  
經行權能爲所難

何責焉不見斷髮割耳古所賢何況弱息九死堅以風  
末俗媮且愆我詩爲廣柏舟篇兩髦者誰與俱傳

集陶爲某題照

衡門之下被褐幽居齋宇廓然林竹翳如靄靄停雲翩  
翩飛鳥和以七絃遠之八表人生若寄匪道曷依行歌  
負薪今也遇之有琴有書獨養其志遙遙三湘每有會  
意

吳槐江制府枉詩見存並錄示近句詞意拳拳率  
成四章奉訓

重臣天遣鎮荆襄五載行間髣漸霜

錄示除夕寄內詩云梅花不見五經

春寄語江南同夢人

聖主自能明薏苡邦人久與賦鱗魴洗兵

惟待數甘雨行部休教倦  
菱裳多少瘡痍方託命  
早將刀犢化農桑

越嶺燕臺感昔游書來更與溯同舟

自己丑歲下第偕君南還放闌甚險

情景如昨忽忽三十六年矣

石交四海嗟無幾噩夢三生恐未休公

爲蒼生瘁籌筆我於素食病支裘  
楚雲千疊思何限清歎何當共庾樓

金甲初銷江漢濱軍中韓范拜  
恩頻壯猶地尚資方

叔威望民宜借冠恂正以錯盤材  
見大還期休養物皆春平生雅量區區識願使羣僚徧飲醇

自掩蓬門暮景馳敢云伏櫪有遐思  
恩追元老憐才日

情重良朋話別時風雨鴈行都化淚

令兄竹橋太史關干去歲歸道山



河燈影互看詩鄉園莫問梅花信

來詩云閣畔梅花齊放未忍寒遙憶賦詩

頻努力旂常荅 主知

### 墮齒偶成

予年六十六時維甲子年左車齒撼搖涉冬墮一焉人  
生骸有百一一賦自天耳以虛善受舌以柔克全唯齒  
恃其剛決物碎萬于寧知徹而銳終易蹶且顛憶從齧  
齧來共歷寒暑煎初動衰始兆漸脫氣不延何特豁可  
恥驅死茲先鞭次第倒玉山人力無能旋固知四大合  
難比金石堅一綫造化根骨餘命脈連其完不自覺其  
損乃自憐誰能外此軀委蛻如秋蟬彼鈍侔王丞或冷  
效褚淵高人石爲漱美女貝若編靡不隨形盡歸土泯

醜妍我今太常齋已斷何肉緣雖缺呼吸防尚幸咀嚼  
便願學無心人杜詩齒豁本是無心人飢飯困即眠人世多坎窞  
近驗頻輔邊任運聊騰騰彭殤但後先大藥在虛無尺  
宅與寸田波斯悟面皴見不恒河遷能知齒墮者此即  
大覺仙倘容證無生不礙口吐蓮復爲植靈芽旣以華  
池泉作詩用自勗非繼昌黎篇

輓蔣太守立菴

五十年交屈指稀予未弱冠卽識君相與聯吟眼看身世及斜暉浮  
生易逐勞薪盡入道都如退鷁飛秋間訪君病中猶以研窮閩洛諸儒書無  
爲恨所得力爲恨叔向畧知貧可賀范文無奈死先祈羨君三徑  
揮塵去不管人間有是非

壯歲郎潛望若仙一官領郡竟歸田方期桑苧能扶老  
豈意龍蛇遽厄賢白髮驚心唯舊侶青山踐約是餘年  
祇應祭社推醇行宦績鄉評儘足傳

喜篠如旋里口占卽寄曼亭

一十六年別相看淚互傾也知宜老瘦直若憫更生有  
味鄉園夢難言骨肉情歲殘無幾日珍重夜釭明  
鴻鴈謀還易兵戈信幸稀竟於衰病後仍得影形依婚  
嫁憑兒輩艱危了世機尚憐秋浦客江漢未成歸

壽印山五十

半百年華清鏡中養生且繼漆園公知非學自師蘧瑗  
却聘狂寧效陸通經籍盡鎔才士氣門庭眞具古人風

初衣差幸同方早

子年五十歸田

得受他山砥礪功

業有名山勝石渠况君道味益蓬廬直從家世靈椿後  
漸到身心太璞初貧計但資僧孺筆貴交并少巨源書  
幾多弟子青雲去載酒還同問字餘

林上舍葆舒以其祖湘洲翁萊綵娛親圖索題爲

賦絕句四首

識面依稀古貌翁活人妙手有全功

湘洲善岐黃子曾識之時年已八十

矣誰知一片仁慈意根在庭幃至性中

樹護空詠北堂詩幾個承歡盡孝思試看畫中垂白叟  
婉容曾不異孩時

寸草誰云可報春鼎烹難及九泉親自慚一著朝衫後

淚灑終天作鮮民

世澤須從內行長  
文孫什襲可流芳  
此圖直衍傳家訓  
抵讀開宗第一章

小除夕篠如以鄂城家書付閱却寄曼亭

霜裘浙浙對寒空  
骨肉鄉閭得暫同  
遠夢尚飛燈炮後  
殘年又盡雨聲中  
浮生無著思禪侶  
塵事難知羨醉翁  
打點祭詩兼祀竈

予檢點吟葉篠如亦以近作見示

頭顱努力待春風

與篠如夜話歸後枕上偶成

小園風雨晝冥冥  
高閣層廊戶半扃  
直待旁人問花信  
始知春去已飄零

荒廬無復足音聲  
何用書門仿翟公  
一任人呼木居士

世情冷暖不言中

一龕佛火照人懷  
嬾性從今百不諧  
莫爲庾郎嗟  
二韭老夫已慣太常齋

憶從吟社結頻陽  
又合離睽雨水傍  
總角情懷都歷歷  
長繩好與繫扶桑

一巷過從豈定期  
短筇扶我况差宜  
却思聚散鴻泥爪  
燭剪西窗亦幾時

口占示篠如

千里歸來意倍親  
相憐俱是白頭人  
話從丙夜追陳跡  
詩借辛盤得早春  
黃絹有才由慧業  
青山可共是閒身  
一龕佛火吾衰託  
却笑容華欠淨因

容華楊盈川女  
姪也有才思

除夕示巖兒

桑榆百事付蒼天  
歲序憑銷髻雪邊  
愁汝漸當門祚薄  
羨人能有子孫賢  
體思敗絮溫常在  
心擬平波怒不遷  
何必他年求幹蠱  
令名貽我及生前  
詩禮相承一脈微  
學荒已與硯田違  
能貧便是傳家寶  
多患須知忍性機  
清白但令兒輩守  
險巇休怪世情非  
春風忽忽催人老  
莫效而翁悵夕暉

題官司馬眉山小照

宦海收帆自在人  
青袍聊示宰官身  
只因夙世餐霞慣  
不染寰區十丈塵

小住吳趨作寓公  
髻絲披拂釀春風  
不知幾載鶯花隊

可也繁華到眼空

偶借三毫成玉貌儘堪雙舄戲清都若逢春夢婆相笑  
也抵坡公笠屐圖

自是人間翰墨緣題詩先識畫中仙何當真結蓮宗社  
共證南方五味禪

壽洪稚存六十

洪厓本是古仙人已謫塵寰六十春孤露早全慈母教  
崢嶸晚勵宿儒身傳經家有編蒲子問字門多載酒賓  
莫問江湖與廊廟後凋長作太平民

鳶肩火色擬封侯萬里歸來一敝裘 聖主恩深寬九  
死才人氣盛足千秋身經絕塞增純固名在窮鄉出輩



流君號更生叅小劫笑看富貴等蚍蜉

題劉刺史笏菴涉江圖

笏菴居士湖海儔長身鶴立凌高秋昔年與我同宦游  
幾舸直指閩雲浮亂礁怪石蛟龍愁君挂片席行夷猶  
別後一官向湘水政成不擾民氣喜忽然將母切心肝  
至性如曾感嚙指歸來侍疾依北堂半載得盡孺慕腸  
袁師不解十日帶陸襲每致三升漿素冠過我容蒼蒼  
繪此小像一葦杭胡爲翩然作道裝飄舉似欲窮搏桑  
我聞湘山古有化身佛無量壽光留齒髮君牧茲土良  
有緣定得精誠通恍惚得母久歷人海中將超方外尋  
琳宮滄江萬頃不足畏赤脚徑渡長天風吁嗟乎達磨

東來越千載赤縣神州幾人在但能忠信涉波濤卽是  
莊嚴合精采君行復踏粵嶠雲爲我稽首雙足尊一花  
五葉唯前因願持梵夾吹誦勤眼前且脫布韞塵他年  
彼岸倘問津

鄭楓人觀察以金君小照索題爲書絕句三首

湖上相逢烟水秋

曾于湖濱與金君一面

乞詩便藉鄭瓜州人生

翰墨緣如此豈惜狂吟一贈投

小山花發空歸隱空谷香生合坐忘  
穉子亦知濠上樂  
定應曾次有羲皇

十年湖海耳君名手散黃金似土輕  
我是休官陶靖節  
但從冷處訂鷗盟

附試帖

潤物細無聲二首和韻

霖霖當春好無聲咏既霑空堦聽自寂遠陌織還織稍  
覺檐花墮剛教土脈粘釀甘和露滲散澤與風恬暗想  
池痕動遙看草色添濕衣寒已薄灑道滑虛覘勢豈同  
枝濯功惟發氣潛如酥皆厚德生養嘿能兼

本以膏能降因知品盡霑但看滋地渥莫辨灑空纖葉  
上聞難得塵邊壓乍粘紋斜飛欲散漏靜引俱恬偶趁  
閑花落微吹野水添犁開深漸透苔暈淺纔覘有態絲  
同密無驚蟄自潛陳芳方待澤時化倘容兼

用汝作霖雨

形求欽帝弼海宇兆甘霖直以從天降先教沃朕心蒼  
生方待澤丹陛好攄忱十日占應驗三庚虐敢侵救時  
功自渥濟物道能任氣已從龍合交還得水深雲霓憑  
慰望苗黍佇添陰禱祀 明廷切商巖勉嗣音

拔茅連茹二首

聖代掄才衆旁求象拔茅懷珍升貴聚擢秀泰常交漸  
苗經疎雨叢生簇近郊葉滋依械樸根引出蒲菱晝取  
循幽俗遐征辨楚包擷來初滿把束處半餘苞九畹芳  
同掇雙岐瑞敢拋采供清廟用明酌薦芳肴

拔萃方賢進羣升上下交儲材占藉用比類詠于茅素  
質看雲露幽姿待甌包白華生自蔓清晝擇寧淆妙已

舉三脊亨還兆一爻肯教遺下體聊取坼方苞育擬菁  
莪盛收殊菅蒯嘲從今辭草莽競秀到皇郊

反舌無聲

炎景催新序微禽解斂聲晴窗初撤響遠樹寂含清乍  
覺朝眠穩還從衆語驚綠陰飛尚逐紺尾掠徒輕豈有  
三緘畏曾無百轉情呼風簀竟澁喚曙恨誰平振翩知  
春去棲枝感候更明時占遠佞願化上林鶯

德車結旌

崇文徵玉輅昭德在華旌蜺建威寧改龍攄態稍更風  
雖吹翟羽軫已靜鸞鳴繚繞雙竿合紛蕤九軌平宮雲  
憑擁護苑柳絕飛縈緩過花空拂徐揚鳥不驚緩從分

大小常擬紀勲名樂御瞻天上招搖萬載清

玉韞山含輝

太璞依深谷珉潛氣可探乍彰圭璧望已令砭砭慙剖  
待連城購珍先照乘含岩花開藉潤崖乳滴因甘虹吐  
初生白烟和待種藍林重暈采鬱岫合夜光覃輯瑞徵  
宜五懷奇獻可三匿瑕希自達孚尹廟廊諳

至人心鏡

至德符軒鏡彤階睿鑒生藏輝原朗澈妙用絕將迎鑄  
憶靈臺炯磨看夜氣清銀花方寸啓玉匣在中瑩豈患  
疲于照良由靜則明辟邪千慮淨容物萬方平精一宜  
成象圓通本莫名 皇衷仁壽在金鑑不須呈

披沙揀金

至寶生沙際時來望氣尋  
恒河探未厭麗水賞猶沉  
乍覺星光燦旋看日影森  
滿簾收待漸躍冶試期深  
豈意泥塗委俄教貢牧欽  
錙銖珍自昔淘汰貴從今  
上幣求無價雙南贈有心  
在鎔依大匠所媿比兼金

夏雲多奇峯

炎雲空外起作勢肖層峯  
縹緲晴初見崑崙影漸濃  
排空成黛色湧岫得烟容  
乍聳靈仙竈徐分宛委封  
垂天驚海島壓殿仰神宗  
削出隨風幻飛來映日重  
合原因觸石望亦擬支筇  
五色希常近蓬瀛咫尺逢

主言如絲二首

帝謂頒天上彌綸象引絲布來丹陛遠傳出綵毫遲獨  
繭乾綱運熏絃解澤施八紘紛待理五夜密抽思慎覺  
樞機貴文看黼黻滋繩原從則正緒豈亂難治析縷宣  
蒼甸尋端攬玉墀鳳池司出納備職亦衣絀

九重傳命處一縷運思初緒自垂裳出機還抽繭如綱  
維分睿慮杼柚在幾餘酌理三縑潔敷文五絨舒更張  
懲削藁謹凜守衣袵默布資經緯遐宣辨密疎銜從丹  
鳳口染憶白麻書綸綍如天煥摘毫愧玉除

臨風舒錦二首

清才傳賦手艷藻發文憲思擬明吳練詞看濯蜀江織  
來勞彩筆張處集仙幢展續茱萸亂吹花鸞鶯降霞翻



成色五日漾作紋雙影自垂天麗聲原擲地璚流輝搖  
琉璃餘采落蘭苕黼黻懷前哲龍文愧獨扛

染翰方舒錦驚才到眼懽明光詞藻發經緯賦心降翠  
纈梭投八鴛文影散雙霞波呈海室虹采煥天杠乍展  
隨雕幕遙披映綺窓紛綈皆繡段熨貼待華釭囊負樓  
中李毫探夢裏江七襄慚妙手五色望雲幢

玉水記方流

賦物顏詩巧泉流爲玉方懷珍循渚澤著采協圭璋琢  
未煩刀切撈先驗綺匡漾稜成細浪劃岸得寒芒肖影  
原藏櫝浮痕亦截肪池宜華月照波作曉匳張中矩隨  
風出含晶界日長破觚嗤瓦礫昭質本巖廊

早荷承瑞露

太波南熏到亭亭見碧荷銀塘初擢秀玉壺漸凝和近  
曉明珠墮臨風翠蓋摩香纔尋拂檻影尚怯凌波乍疊  
千錢小遙分百琲多霏微魚戲動錯落雨喧過仙掌宜  
成頌蘭橈佇發歌蓼蕭恩自近待澤意如何

熏風自南來

殿角祥飈起時和應節來初生鶉火次潛逐斗杓迴竹  
靜鳴纔覺葵傾影乍催遙飛隨越鳥漸轉到燕臺布德  
車從指揚輝霧共開晴窓吹偃仰別浦漾滌洞韻協揮  
弦曲香飄獻壽杯披襟期作賦不競媿雄才

天驥呈材

徵祥從太乙天馬自西來月駟遙傳種房精妙獻材錦  
韉驕顧視玉勒騁飛迴散雹千錢動追風一電開服鹽  
咄晉阪市骨陋燕臺御榻圖形舊雲衢展步纔九花看  
虎脊萬里溯龍媒赭白尋常賦徒誇七尺駉

葵心傾向日

炎帝開羣卉傾誠有蜀葵誰知一寸草都切九陽思鳴  
脚分初茂烏飛引漸移朱英同發秀翠萼儘迎熙衛足  
曾傳智含丹亦待時銅盤隨宛轉金粉逐參差湛露恩  
還沐疎莖直自持微忱同曝獻連茹到彤墀

玉繩低建章

辨色趨晨禁珠躔仰玉繩五更初的爍雙闕自峻嶒影

接瑤薨麗輝斜碧漢澄含風榆白動拂瓦露同凝宮漏  
清傳箭天街淨展繒乍垂明樹色漸轉晃觚稜鑰啓晴  
烟漾窻融曉仗升紫垣欽不夜辰極儼遙憑

因風想玉珂二首

禁闌春傑直近曙契鳴珂魚鑰千門靜鸞鈴一徑過乍  
看花作態遙憶玉相摩韻隔重垣迥音含瑞露和披禽  
哢乍雜宮漏聽還訛定逐星光到寧來曉騎呵心先馳  
綵仗夢尚繞丹莎坐待分曹入崇階效載歌

待漏嚴宵永綸扉夕影籠華燈驚落燼寶轂想隨風彷彿和鸞到依稀曉仗融銅壺清尚滴鈴索暗相通過闕  
聲宜歇聯鑣韻自同心隨宮柳颺耳逐曙鶯空鳴佩遲

丹陛棲雞靜夕楓宵衣當此際問夜切宸衷

五字擢英才

晉代崇綸閣披章睿鑑開曾因工視草却得妙呈才  
稱旨初丹陛分榮遂拔臺拔同三字雋判許五花陪舊  
譽徵擢筆新恩異卜枚看花紅藥乍傳詔紫泥纔敏捷  
千言待恢宏九制推常楊須媲美被省永栽培

夏蟲語冰

物解因時囿疑冰理可徵但看滋濕化那許識堅凝羽  
競洪鑪振心難朗鑑澄履雖知戰戰飛自哂薨薨莫問  
登盤潔徒來繞砌矜溫風吹或悟寒谷啓無憑魚上從  
更候蠅緣祇益憎所調愆伏大蠕動愧分能

喻物從當暑難投笑鑿氷炎涼原判解臭腐敢誇能未  
泮看方訝如焚趣尚矜智還憐一羽納枉示三凌霜履  
空傳戒雷驚未破曹塵蟬都暫寄玉鑑總徒澄執熱情  
偏異攻堅問可曾唯應訪窮谷作蘭野蠶登

日長如小年

豈有壺中術山居得駐年北窗虛紀歲南陸漫量天靜  
覺槐陰轉疑隨其葉遷消炎棋罷局觀逝竹流泉見豈  
同朝權心還訝暮蟬頓忘分寸惜似覺燠寒愆小坐寧  
逢閏清吟且暫仙靈椿如可溯視蔭一欣然

江清月近人

何意清輝逼江干霽色新一輪浮自好千里望彌真影

逐危篷轉涼催獨客頻空唯兼夜氣朗不悵迷津但覺  
天圓野從看鑑絕塵烟波神自遠河漢意相親照爾同  
烏鵲愁予有白蘋只應歌擊楫把盞作三人

迴圓成壁

縣試命此題無  
佳者作此示之

瑞雪當空降班形以壁傳轉環因朔吹積玉異方田蒲  
穀應難辨瓊瑤喜乍全一規誰刻琢六出自迴旋盈尺  
寧堪寶霏花足稔年潔休珍若拱寒或毀爲圓委素原  
無定磨棱亦偶然清詞覘在握賦物妙前賢